


**ACATISTUL
SF. CUVIOS
IOAN
DE LA USTIUJ**



Page 1 of 16



Акафист блаженному Иоанну, Устюжскому чудотворцу

Кондак 1

Избранный угодниче Христов и предстателю наш у Святыя Троицы, Иоанне всеблаженне, похвальными песнями от любви душевныя ублажаем тя заступника и покровителя нашего. Ты же, яко имеяй дерзновение ко Господу, от всяких бед и напастей свободи нас, да зовем ти: Радуйся, Иоанне, преславный чудотворче.

Икос 1

Ангели радовахуся житию твоему, святче Божий Иоанне: вся бо земная во уметы вменил еси, нищету же вольную от юности до гроба претерпевая, Христа ради юрод был еси. Темже ублажаем тя:

Радуйся, совершенный нестяжателю, едино точию рубище раздранное имевый о чреслах твоих.

Радуйся, постниче, во дни среды и пятка ничтоже вкушавый.

Радуйся, воине Христов, благодатию Его мир, плоть и диавола победивый.

Радуйся, молитвенниче, руце ко Господу о творящих неправду воздевавый.

Радуйся, святого Прокопия, Христа ради юродиваго, истинный подражателю.

Радуйся, святость жития твоего буйством юрода мудре сокрывавый.

Радуйся, Иоанне, преславный чудотворче.

Кондак 2

Видя суетою мира сего ослепленных, досаждающих и оскорбляющих тя неповинно, не гневался еси на гонителей и обидящих тя, блаженне Иоанне, но молился еси о таковых в сокрушении духа глаголя Богу: Аллилуиа.

Икос 2

Разум богопросвещен имея, преблаженне Иоанне, бегал еси славы человеческия: юродствуя же присно по стогнам града Устюга, многа досаждения и скорби претерпел еси Христа ради. Темже достоин ти звати: Радуйся, самопроизвольный мучениче, биения, оплевания и поношения от неразумных человек претерпевый.

Радуйся, за оскорбителей и гонителей твоих непамятозлобивый милоственниче.

Радуйся, страсти плоти твоея голодом и жаждою умертвивый.

Радуйся, чистотою душевною и телесною благолепно преукрашенный.

Радуйся, нищетою обогативыйся.

Радуйся, нищету сию паче сокровищ всего мира возлюбивый.

Радуйся, Иоанне, преславный чудотворче.

Кондак 3

Сила Честного и Животворящаго Креста
Господня росодательну печь содела ти, якоже
иногда ангел преподобным отроком, о Иоанне
блаженне: оградився бо крестным знамением,
возлегал еси на горящем углии в печи соборная
Успенския церкви, всех подвизая вопити о сем
Творцу чудес Богу: Аллилуиа.

Икос 3

Имый благое помышление о богоугодном житии
твоём, Успенскаго собора иерей Григорий по
вечернем богослужении утаися за дверию храма,
да увестъ, что твориши, един пребывая. Ты же,
о Иоанне богоблаженне, сотворив молитву за
глаголющих лести и творящих неправду,
оградився крестным знамением, возлегал еси в
печь на горящее углие. Егда же иерей, ужасом
объят быв сицеваго ради видения, вниде, ты
убо, абие исторгся из печи, рекл еси: «Еже сам
узрел еси, да никомуже поведаеши до кончины
моея». Сего ради рцем вси:

Радуйся, силою Честного и Животворящаго
Креста Господня на горящем углии без вреда
сохраненный.

Радуйся, росой Духа Пресвятаго орошенный.
Радуйся, пламенем любви яже к Богу и
ближнему пламень пещный устудивый.
Радуйся, теплый молитвенниче, при храме
Богоматере по вся ночи приметатися
изволивый.
Радуйся, христианских добродетелей под
личиною безумия подвижниче.
Радуйся, буйством твоим премудрость
посрамивый.
Радуйся, Иоанне, преславный чудотворче.

Кондак 4

Бурею напастей присно волнуемое житейское
море благодатию Божиею немокренно прошед,
Блаженне Иоанне, достигл еси вечноблаженного
пристанища, идеже несть болезнь, ни печаль, ни
воздыхание. Тамо убо почивая со ангелы и
всеми святыми, поеси Богу: Аллилуиа.

Икос 4

Слышащи болящая Мария, Устюжскаго
наместника Феодора жена, яко имаши обилие
благодати Божия, посла слугу своего, да просить
молитв твоих о исцелении ея. Ты же, угодниче
Божий Иоанне, аки в безумии возопил еси слуге:
Здравствуй, добрый княже со княгинею. Обаче
егда слуга возвратися в дом госпожи своея, узре
ю исцелевшу от жестокаго недуга. Сего ради

глаголем ти:

Радуйся, едином словом тяжкия недуги
исцеливый.

Радуйся, болящую Марию и расслабленную
Аполлинарию молитвою уврачевавый.

Радуйся, бесноватую Евфросинию от
мучительства диавола избавивый.

Радуйся, яко и ныне молитв твоих беси зело
трепещут.

Радуйся, града Устюга радости неотъемлемая.

Радуйся, всех притекающих к тебе утешение
пресладкое.

Радуйся, Иоанне, преславный чудотворче.

Кондак 5

Боготечней звезде подобен был еси, блаженне
Иоанне: шествуя бо по стогнам града Устюга,
восходил еси благодатию Божиею от силы в
силу, и безумствуя пред человеки, божественныя
премудрости исполнен был еси от Бога,
непрестанно воспевая Тому единому: Аллилуиа.

Икос 5

Видя, яко в мире сем, во зле лежащем, несть
житейския сладости печали непричастны,
многоскорбное житие от юности восприял еси,
блаженне Иоанне. Мы же грешнии, ублажающе
терпение твое, зовем ти таковая:

Радуйся, ныне на небеси, занеже преплава

пучину житейского моря на земли плакал еси.
Радуйся, блаженне, многа бо мзда твоя на
небеси.

Радуйся, сопричастниче небесных благ, ихже
око не виде, и ухо не слыша, и на сердце
человеку не взыдоша.

Радуйся, сонаследниче достояния, еже уготована
Бог любящим Его.

Радуйся, града Устюга заступниче.

Радуйся, верою к тебе притекающих
покровителю.

Радуйся, Иоанне, преславный чудотворче.

Кондак 6

Проповедание евангельское, еже не скрывать
себе сокровища на земли, совершенно соблюдая,
не стяжал еси ни злата, ни сребра, но точию
едино рубище раздранное, в немже зиму и лето
необуven пребывая воспевал еси Христу Богу:
Аллилуиа.

Икос 6

Воссияй нам светом твоего благорозумия,
блаженне Иоанне: безумствуя бо присно пред
человеки, ты уразумел еси глубину
божественных премудрости, яко не мудрых
мира сего, но боух о Христе избра Бог в жилище
благодати Своея. Еяже обильно преисполнен
сый, прими от нас сицевая:

Радуйся, от утешителя Духа Истины
обрадованный.

Радуйся, на земли и на небеси прославленный.

Радуйся, узкими враты и тесным путем все
житие шествовавший.

Радуйся, Царствия Божия усердный
взыскателю.

Радуйся, нищеты самопроизвольная образе.

Радуйся, смирения Христова подражателю.

Радуйся, Иоанне, преславный чудотворче.

Кондак 7

Хотя от взора человека святое житие и дивныя
подвиги твоя сокрыти, блаженне Иоанне,
юродствовал еси пред человеки по вся дни, в
нощи же пребывая в непрестанной молитве, из
глубины души взывал еси о всем Богу: Аллилуиа.

Икос 7

Новаго и дивнаго жития явися первоначальник
в земли Российстей блаженный Прокопий
Христа ради юродивый, егоже истинный
подражатель показался еси, блаженне Иоанне.
Темже величаем тя:

Радуйся, добре уразумевый глагол Божий: кая
польза человеку, аще мир весь приобрящет и
отщетит душу свою.

Радуйся, сих ради словес Господних
многоскорбное и многоплачевное житие

восприемый.

Радуйся, радостию неотъемлемою во веки.

Радуйся, прославленный Богом и человеки.

Радуйся, духовными подвиги в тайне
подвизавыйся.

Радуйся, Царствие Небесное сими стяжавый.

Радуйся, Иоанне, преславный чудотворче.

Кондак 8

Странно и чудно житие твое, Иоанне
всехвальне: бегая бо по стогнам града Устюга,
алчбу и жажду претерпевал еси, ничтоже от кого
взимая, и тако юную плоть твою духу покоряя,
всегда воспевал еси Триединому Богу: Аллилуиа.

Икос 8

Весь мир православный молитвенно призывает
тя яко великаго угодника Христова,
достоблаженне Иоанне, и сия зовет ти в
похвалу:

Радуйся, обетований Христовых наследниче.

Радуйся, временною скорбию вечнаго утешения
сподобивыйся.

Радуйся, алчбою и жаждою плоть твою духу
покоривый.

Радуйся, ангелов и всех святых собеседниче.

Радуйся, о всем мире православном
молитвенниче.

Радуйся, земли Российския теплый пред Богом

заступниче.

Радуйся, Иоанне, преславный чудотворче.

Кондак 9

Всякаго греха бегал еси аки яда смертоносна, угодниче Христов Иоанне, и сего ради сподобился еси Царствия Христова. Темже молимтися, помяни и нас многогрешных, ко Святей Троице во умилении зовущих: Аллилуиа.

Икос 9

Витийство наше скудное не довлеет к похвале имене твоего, угодниче Христов Иоанне. Обаче молимтися, не отрини от любви душевныя зовущих ти таковая:

Радуйся, божественных даров носителю.

Радуйся, молящимся тебе скорый помощниче.

Радуйся, почитающим священную память твою вечных благ ходатаю.

Радуйся, скорбящих скорый утешителю.

Радуйся, добрый сеятелю благочестия.

Радуйся, обличителю всякаго нечестия.

Радуйся, Иоанне, преславный чудотворче.

Кондак 10

Спасая душу твою, блаженне Иоанне, не восхотел еси работати Богу и мамоне, но Единому Богу точию. Темже ныне яко верный

раб Владыце своему предстоиши на Небесех, поя
Ему хвалебную песнь: Аллилуиа.

Икос 10

Стена еси непоколебима, блаженне Иоанне, всем
с верою прибегающим к молитвенному
предстательству твоему. Темже припадающе
молимтися яко имущему велие дерзновение у
Христа Бога, молися о нас грешных,
почитающих тя звании сими:

Радуйся, православных христиан твердое
ограждение.

Радуйся, Святыя Церкви благолепное
украшение.

Радуйся, многоскорбное твое течение
благочестно скончавый.

Радуйся, по скончании онаго в пресветлых
райских обителях вселивыйся.

Радуйся, все житие твое во угождение Богу
посвятивый.

Радуйся, во плоти яко ангел безплотен
поживый.

Радуйся, Иоанне, преславный чудотворче.

Кондак 11

Пение благодарственное Единосущней Троице от
всея души возсылал еси, преподобне Иоанне,
ведая кончину земного подвига твоего, еяже с

радостью чая, благодарил еси Бога, зовый:
Аллилуиа.

Икос 11

Светло сияющее лице твое, аки ангела Божия, и
тело твое аки снег бело обретеса, егда
преставился еси ко Господу, блаженне Иоанне:
многоскорбнаго бо ради претруднаго подвига
твоего, дарова ти Господь кончину
христианскую. Еяже молитвами твоими сподоби
и нас грешных, да зовем ти таковая:

Радуйся, в горний Сион Царя Небеснаго душею
востекий.

Радуйся, яко тамо, предстоя Ему, о всех нас
тепле ходатайствуеши.

Радуйся, во время нощнаго подвига течение
твое скончавый.

Радуйся, христианскую кончину безболезненну,
непостыдну и мирну от Господа восприемый.

Радуйся, глубокаго смирения стяжателю.

Радуйся, кротости и терпения Христова
предивный подражателю.

Радуйся, Иоанне, преславный чудотворче.

Кондак 12

Благодать данную ти от Бога ведяще,
благоговейно покланяемся святым мощем твоим,
лобызаем святолепное изображение лика твоего,
угодниче Божий Иоанне, и молимтися, не остави

нас твоим молитвенным предстательством ко Христу Богу, Ему же благодарне поем: Аллилуиа.

Икос 12

Поюще твое житие, восхваляем мирную кончину твою, блаженне Иоанне, и молимтися, буди нам во всем ко благу скорый помощниче, зовущим ти таковая:

Радуйся, яко одежды греховныя совлеклся еси.

Радуйся, яко в ризу чистоты и непорочности облеклся еси.

Радуйся, града Устюга добрый и неусыпный блюстителю.

Радуйся, яко о всех с верою молящихся тебе присно ко Господу ходатайствуеши.

Радуйся, терпения и злострадания дивный образе.

Радуйся, всех добродетелей зеркало пресветлое.

Радуйся, Иоанне, преславный чудотворче.

Кондак 13

О всеблаженный святой праведный Иоанне!

Приими сие малое хвалебное пение наше, и

избави нас от всякаго злаго обстояния, от

напрасныя смерти и вечныя муки, и сподоби

нас твоим предстательством к Богу, да с тобою и

всеми святыми поем Ему во веки: Аллилуиа.

Этот Кондак читается трижды, затем Икос 1-й и Кондак 1-й

Молитва

О святой блаженный Иоанне! Припадающе смиренно молимся, прими наше малое моление, и умоли Всемиловитоваго Господа Бога нашего, да пробавит милость Свою нам грешным и да дарует нам вся яже к животу и ко спасению благопотребная.

О угодниче Христов! Аще и зело недостойни есмы, обаче духом сокрушенным и сердцем смиренным паки припадающе молимся: предстательством твоим ко Господу, благопоспеси; страждущую страну Российскую, Господь от лютых безбожников и власти их да свободит, и да возставит престол православных правителей; верных рабов Его, в скорби и печали день и ночь вопиющих к нему, многоболезный вопль да услышит и да изведет от погибели живот наш. Град твой Устюг и вся грады и веси Российския соблюди от всякаго зла и всякия напасти, губительства, глада, труса, потопа, огня, меча, нашествия иноплемеников и междоусобных брани, от всякия болезни и от всякаго обстояния, да всегда поем и величаем Всесвятое и Великолепое имя Божие, и твое милостивое о нас предстательство во веки веков. Аминь.



ПОЛНЬІЙ АКАФИСТНИК КАНОНИЧЕСКІЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

І

НОВОЕ
* НЕБО